

# Jadikan Parlimen tempat membela rakyat — Dr. M

KUALA LUMPUR, Selasa — Datuk Seri Dr. Mahathir Mohamad hari ini menekankan perlunya wakil-wakil rakyat meningkatkan kebolehan menggunakan Parlimen sebagai forum untuk menyuarakan segala pandangan dan kesulitan rakyat.

Dalam hubungan ini, Timbalan Perdana Menteri menegaskan, wakil rakyat perlu memahami segala peraturan Parlimen dan Dewan Rakyat, khususnya berhubung dengan perbahasan.

"Perbahasan mesti dijalankan dengan tertib untuk memastikan Dewan mendapat penghormatan yang sewajarnya dari rakyat.

"Jika Dewan tidak dihormati rakyat, ini bermakna Kerajaan juga tidak mendapat penghormatan dan sekiranya ini berlaku, pentadbiran negara akan menjadi huru-hara," tegasnya.

## Cukup adil

Datuk Seri Dr. Mahathir berkata demikian ketika meraasmikan seminar mengenai 'Amalan dan Peraturan Parlimen' di Dewan Rakyat di sini.

Seminar tiga hari anjuran Persatuan Ahli-ahli Parlimen Komanwel Cawangan Malaysia dihadiri oleh 80 peratus terdiri dari Ahli Parlimen, Ahli Dewan Negara dan Speaker-speaker Dewan Undangan Negeri.

Bellau menambah, banyak negara merdeka di dunia cuba mengamalkan sistem pemerintahan demokrasi berparlimen, tetapi gagal dan corak pemerintahan mereka kemudian berpindah kepada sistem diktator.

"Malahan Parlimen di setengah negara digunakan semata-mata sebagai tempat ahli-ahli Parlimen bertelagah dan bukan tempat untuk menyuarakan pandangan dan masalah yang dihadapi oleh rakyat.

"Bila seseorang ahli tidak dapat lagi mengawal perasaannya, terutamanya setelah kalah dalam sesuatu perbahasan, Dewan akan menjadi kelam kabut dengan peristiwa lontar-melontar buku dan sebagainya," tambahnya.

Datuk Seri Dr. Mahathir menjelaskan peristiwa seumpama itu dapat dielakkan dari berlaku sekiranya Ahli-ahli Parlimen memahami sepenuhnya peraturan berhubung dengan sistem demokrasi berparlimen.